

■ Ma grand disié : «*li flour de sant Jóusè anóuncion lou printèms*».

Es ansin que de toulo ma jouinesso ai nouma li jacinto. Pèr ieu «*flour de sant Jóusè*» èro lou noum vertadié d'aquelo flour tant redoulènto qu'espelis au mes de mars e que, d'efèt, es ansin anounciarellu de la primo. Ai demanda d'eici, d'eila, en d'ami s'avien ausi dins sa jouvènço aquesto espressioun mai, de bado. Belèu qu'un de nòsti legière poudra nous counfierma aquesto apelacioun de «*flour de sant Jóusè*» pèr nòstis àvi.


Se capito que vous dise acò bord que siéu asseta dins lou jardin. Adeja viesti en ciclista, acabe ma bolo de choucoulat caud e siéu lèst pèr l'escourregudo. Mai pamens, aquésti «*flour de sant Jóusè*» que me picon l'ieu despièti un moumenet e qu'an trachi au pèd d'un rousié que fai si fueio, me pivellon e sobre-tout me ramenton tant de souveni d'enfanço. Verai que la bello sesoun sèmblo de s'acampa despièti quauqui jour. De pertout i'a proun de marco que lou laisson pensa (*foutò 1*). Lou rigau es vengu nous faire sis adessias sus lou lindau de l'oustau : es un signe que troumpo pas; lou veiren plus jusquo i premiéri fre de l'autouno (*foutò 2*).

Quand parlas dis aucèu!

Me demande...vo, vo, me demande se l'escourregudo la faren pas dins lou jardin e sènsò velò! Sias d'accord? Zóu, tant miés! Alor anas leissa vòsti biciéucleto contro la paret dóu garage e ges de tèms de perdre. Anen coumença e siéu segur que se coundoustaren touto la matinado. Lou soulèu nous rescaufara lis espalo en escalant plan plan dins lou cèu blu sènsò nivo mai pas sènsò iroundo que soun deja arribado di païs caud mounte an passa la marrido sesoun. Volon dins l'èr en quilant e se rounstant à la recerco de soun manja, mouissaloun e àutri pichots insèite que, pecaire, an pas gaire de chanço de passa pèr maio.

Quand parlas dis aucèu! Tè, justamen, lou merle arrecoumenço de sibla; es quiha despièti la pouncho d'aubo sus la cimo dóu grand falabreguié di vesin. S'èro arresta 'n moumen quouro avès mourreja, mai lou vaqui que repren sa cansoun e vague, jusquo à jour fali. I'a de cop que te vèn en òdi! Ah, qu'arribèsson lèu li cigalo, em' acò nous faran coutrio sa cantadisso, un councert que perdurara tout lou sanclame de l'estiéu! Ié sian accustum... Enfin, pas tòuti. Me siéu leissa dire i'a dous o tres an d'acò qu'un estrangié de l'uba se venguè plagne à la coumuno de sa vilo d'adóucioun pèr que li cigalo fuguèsson tòuti escoufidol!... Autant assaja d'estermina tòuti li pesou de la testo d'un rascas...

Lou jardin à la primo : di flour au fru




Li gendarmo fan sis amour

Mai vesès pulèu sus li pichot gravié! Despièti quauqui jour li gendarmo fan sis amour (*foutò 3*). E alor n'i'a à moulounado que quiéu à quiéu, dous pèr dous, caminon, gaiard, sènsò s'arresta. L'un avanço, e... fourçadamen, l'autre requiéulo. Noun se pòu faire autramen. De cop s'arrèston e aquéu que requiéulavo, zóu... avanço. Aquéu biais de camina me fai pensa à-n-un véhicule militari qu'ai counieigu à la debuto de ma carriero e que ié disien l'EBR (*engin blindé de reconnaissance*). Se capito que sa toco èro d'estre davans pèr durbi la routo à-n-uno troupo moutourisado en destouscant l'enemi. Sa particularita es qu'avié dous moutur, un davans e l'autre darrié e douc dous ome que menavon lou véhicule. Quouro l'enemi èro en visto, l'EBR poudié tira 'mé soun canoun pièi, sènsò faire mié-tour, quatecant requiéula pèr se bouta à la sousto. Vous dise voulountié acò, bord que dintre li legière nostre, n'i'a proun qu'an degu counèisse quel engen blinda. L'atahut dóu generau de Gaule fuguè pourta pèr un EBR à sis óussèqui.




2



3



4



5



6

Mai revenen à nòsti gendarmo, de coulour negro e roujo coume lou vièsti qu'an carga nòsti gendarmo francés de siècle de tems. Vaqui un inseïte que fau bèn proutegi que s'apitanço d'autris inseïte, marrit aquéli, coume li pesou e li nieroun que sagaton flour, fueio e liéume de nòsti jardin...

Vous vau mena aro dins un endré que lou soulèu ié vèn proun tard. Se sian crespina, auren l'óucasioun de vèire encaro quàuqui degout d'eigagno sus li fueio de rousié... Oh couquin de sort, velaqui la bello foutò de faire! Just e just ço qu'esperave. Zou, à vòsti bouito! (foutò 4).

La telarago

En passant proche l'oustau, vous prepause de nous asseta un moumenet soto la touno emmantelado de flour de glicino coume se n'en vèi pas souvènt. L'an passa, avèn agu quatre flour! Aquest an, la touno es à mand de s'escranca soto lou pes de tant de branco flourido (foutò 5). Ausès un pau li voun-voun de touti lis inseïte que vènon s'enclusca en pipant lou poulen. Avès aqui lis abiho, bèn segur, que sorton tout bèu just de si brusc ,mai tambèn li tavan, li guèspo e àutri mousco de tutto meno que ié fan un chafaret à noun plus!

Dins un recantoun, entre dous aubrihou, proun bèn escoundudo, mai trahido pèr lou soulèu que mounto, l'aragno nous porjo un bèle eisèmple d'architeituro coume se n'en vèi pas souvènt : sa telarago, qu'a degu basti dins la niue bord qu'aièr i'ero pancaro. Acò tambèn s'amerito de ié passa un moumen pèr vèire un pau e chifra coume l'animalun s'organiso pèr derraba sa vido! Eici, au bèu mitan de si fiéu d'aran (foutò 6), espèro d'ouro e d'ouro, sènso boulega, qu'un pauras de mouissaloun vèngue s'empega. L'inseïte, ansin aganta, aura pas lou tems de coumprendre çò que i'arrivo que l'aragno se rounsera sus éu pèr i'enjita soun verin mourtau... Ansin èi la lèi de la naturo e rèn e res ié poudran chanja quicon! Lou gros manjara sèmpre lou pichot. En parlant d'acò, ai de faire mèfi emé mi 60 kilò tout bagna. Pamens, pèr l'ouro, siéu toujour aqui. Quau me manjarié qu'ai

que la pèu e lis os, mai pamens un pau de muscle dins li boutèu pèr pedala...

La granouio aprivadado

Despièi la fin de l'ivèr que, siguèsse dich en passant, es esta mai brave que l'an passa, qu'aguerian 50 centimètre de nèu à Sant-Roumié en tres cop, se capito qu'uno pichoto granouio verdo, poulideto coume tout, trèvo lou jardin en s'aprouchant que mai de l'oustau. Anan la cerca un moumen e siéu segur que se gardan lou chut-chut, quaucun la troubara. Arregardas un pau sus lou rebord di fenèstro, prouvable que nous espèro pèr nous bada un bon moumen avans de s'esbigna en sautant au mitan di planto flourido. Auren pas de cerca long-tèms! Tè, velaqui ! Aqueste cop, espèro sus lou crouchet dóu contro-vènt. Es-ti pas pourido touto verdo, proupreto e lusènto coume se sourtié de sa bagnadouiro (*foutò 7*)?


32

Me sèmble pamens qu'es un pau esfriado de vèire tant de mounde dins lou jardin e sara pas longo pèr sauta. Mai se la vesias quand siéu soulet e qu'aproche, se reviro de-vers iéu, duerb d'ieu coume lou poung, ié dise quàuqui mot plasènt e m'escouto; siéu segur que me coumpren. Boulego pas, franc quàuqui cop sa tèsto pèr miés me vèire quand càmbie de plaço. De-fes, restan ansin, tóuti dous, de long moumen mai pièi la laisse pèr countunia mis obro. Me regardo parti! I'a dins la vido de moumen mounte l'ome, sènso ana bèn liuen, se pòu senti proche la naturo e, perqué pas, s'amiga 'm' uno granouio. N'en vese dintre vautre que fan rire de chin, tant pis pèr éli... sabon pas ço que mancon... E, tè! Soun-ti pas bèu aquéli croucus bessoun (*foutò 8*) dins l'erbeto que ié sèr d'escrin? Li fau remira tre que li vesès durbi que, boutho, passisson lèu; sa vido es bèn courteto : quàuquis ouro e pièi pas mai.

Lis agasso en bousco d'uno sousto

Aro que ié pènse, en passant proche l'auciprè, me ramente un evenimen que s'es debana i'a dous an à la memo pountannado. Vaqui-ti pas qu'un parèu d'agasso s'èro mes en tèsto de nisa sus la pouncho de neste aubre miiterran à quàsi 15 mètre d'aut (*foutò 9*)!

Un bèu matin, d'ouro, que dejunave sus la terrasso, lou parèu s'acampo e se pauso sus l'auto téulissò dóu mas, proche l'oustau. Ié sian acoustuma; d'ourdinàri barjacon un moumenet pièi s'envan. Mai aquéu matin d'aqui, li dos bèsti vouladisso di plomo negro e blanco semblavon bèn decidado de resta dins l'endré. E vague de voulastreja entre l'auto téulissò e moun ciprès. Me siéu lèu avisa qu'avien dins l'idèio de nisa en aut de l'aubre! Touto la matinado an fa d'ana-veni



emé dins lou bè tout ço qu'èro necite pèr basti lou nis.

Ah, bèn, es egau, me siéu di! Mancarié plus qu'acò! finido la tranquileta e lou silènci. Acò se passara pas ansin, es iéu que vous lou dise!

E iéu, de crida, de pica dins li man, de brasseja pèr ié faire pòu... mai de-bado! Noun soucamen countuniavon soun pres-fa, mai dous àutri parèu d'aucèu venguèron se pausa sus la téulisso, bramadis que noun sai pèr me faire coumprendre qu'èro pas un animau di dos cambo qu'empacharié lou nis d'èstre basti sus lou ciprèses.

Aguessias vist e ausi l'espèctacle! Sus li téule, li quatre aucèu enfuria quilavon à noun plus, voulastrejavon vers iéu dins l'amiro de me faire pòu pièi remountavon; iéu, en bas jitave de pougnado de gravié vers la pouncho de l'aubre, mai acò despassavo pas la mita de soun autour e me retoumbavo dessus; picave em' uno cuiero sus lou quiéu d'uno grosso casseirolo ; dins lou vesinage, li chin japavon, li vesin averti pèr tout aquéu chafaret s'acampavon pèr èstre de l'espèctacle... e ma femo, sourtido de sa cousin, que me demandavo s'ère pas niais... basto! l'afaire èro parti pèr dura proun de tèms que dejá la journado s'acabavo!

Mai, bonur pèr iéu, un di tres flèu de Prouvènço coume disien nòsti davancié, lou vent-terrau, segne mistrau, se boutè à boufa à la subito en fin de journado!

N'en vos de mistralado, n'en vaqui! L'aubre pounchu, bacela pèr lou ventaras, se giblè d'eici, d'eila, si branco d'en aut s'escartèron, se crouseron, s'envertouïeron bèn talamen que lou parèu d'agasso qu'avié, prouvable, bèn oubra pèr l'alestimén dòu nis mau-grat tout aquéu tarabast, prenguè pòu e s'esbignè, segui de proche pèr li dous autre.

L'endeman matin ma cregnènço fuguè vano, que lis aucèu revenguèron pas. Prouvable qu'anèron assaja de basti lou nis dins un endré un pau mai tranquile e sobre-tout dins un aubre di branco mai redo qu'auquéli d'un ciprèse, aquélis empego!

Lou rousen de Lagoy


Mai parle, parle e belèu que sarié lou moumen de béure lou got de l'amista. Que n'en pensas, que? E, d'abord qu'enfourcaren pas nòsti velò vuei, de que dirias de tasta lou rousen dòu castèu de Lagoy. Es un vin requist que si rasin s'amaduron sus lou planestèu de la Pichoto Crau, aquesto colo coudoulouso que s'esperlongo de l'adré à l'uba entre Sant-Roumié e Novo e que n'en vesèn despièi l'oustau la premiero pinedo à tout bèu just 200 mètre? Ma femo a alesti quauqui sieto de car-salado que manjaren emé lou pan de l'oustau encaro tout caud sourti dòu four. Tout acò passara bèn em' un got de Lagoy rousen!

Sian bèn, que, souto la glicino? I'a toujour autant de vounvounamen sus nòsti tèsto, lou mèu sara bon! Zou, turten lou got que lou vin es bèn fres coume se dèu. Mai mèfi, tu! As uno guèspo qu'es en trin de s'ennega dins toun got! Pas estounant emé lou pes di boulo de poulèn que s'es empegado sus li pato, a pas pouscu sourti de la glicino e a cabussa vers la taulo. Te dise iéu que dèu èstre uno guèspo «estakanovisto» pèr s'èstre autant cargado avans de tira vers lou nis!

Pèr quicho-clau, vous dirai que siéu bèn countènt qu'aguessian passa nosto escourregudo au miéu, dins lou jardin. V'autri, gènt de la vilo, aurés vist au mens coume se viéu dangeirousamen à la campagno : li guèspo que vous toumbon dessus, lis agasso qu'envahisson voste envirounamen e vous parle pas di fournigo que, tant, ié pren l'envejo de veni vesita vosto cousin pèr s'apastura à-gràtis dins voste bufet : aquéli salouparié de pichòti bèsti an vergouchno de rèn. Arrivon à la codou-loup, rintron dins toun oustau coume un trin en garo, se servon, sorton dòu tèms que d'autro li crouson pèr veni faire si freto!...

Ah, es iéu que vous lou dise! Veramen, sias bèn urous de viéure en vilo. Mai vese que n'i'a que soun bèn countènt d'agué pas pedala au-jour-d'ueil! Sabon pas ço que ié reserve pèr nosto escourregudo à veni... ■

Flour de cereisié



Flour d'ambricotiné

